

Tutu ñanoó nĩtaa taJuan ña ti'ví ra kua'an nda'a nivi na kándixa Jesucristo

Ñayó'o ká'an xa'a To'on Ndios, ña kúu Jesucristo, taa ta kúu ndee ña táxi ndino'o kutaku nivi

¹ Nañani yó xí'in náki'va yó, vitin ká'an ndi xí'in ndó xa'a taa ta xa táku nda on ta'an kixá'á koo kivi noó. Ta mii ndi, xini so'o ndi to'on ña nika'an ra, ta xí'in nduchu noo ndi xini ndi ra, ta chinóo nda'a ndi soko ra. Ta vitin ndátoto'on ndi xí'in ndó xa'a tayó'o, taa ta kúu To'on Ndios, ta kúu ra ndee ña táxi kutaku ndino'o nivi. ² Taa yó'o, ta ndixa ndino'o táku, kixaa ra noo ndi, ta xini ndi ra xí'in nduchu noo ndi, ta vitin ndákuiin ndi xa'a ra noo ndó. Ta ndátoto'on ndi xí'in ndó ndi mii tayó'o kúu ra ndee ña táxi kutaku ndino'o nivi noo Ndios, ta tayó'o nda si'na xa táku ra xí'in Ndios, ta saá Ndios ti'ví ra mii tayó'o ña kixaa ra noo ndi ñoyívi yó'o. ³ Ta vitin ndátoto'on ndi xí'in ndó xa'a ña xa xini ndi, ta xa'a to'on ña nika'an ra ña xini so'o ndi. Ta saá ndó'ó, nivi na kándixa to'on yó'o, ñii káchí vivíi kutaku ndó xí'in ndi, ndatán ñii ki'va vivíi táku ndi xí'in Yivá yó Ndios ta xí'in Sa'ya ra Jesucristo. ⁴ Ta saá taa ndi tutu yó'o ña kundaa ini ndó ta chikaa so'o ndó to'on yó'o. Ta xí'in ña ke'é ndó saá ndixa ná kutú ndaa ñasii ini ndi'i yó.

To'on yó'o ká'an ña, ndatán yóo ño'o ña yé'e, saá yóo Ndios

⁵ Ñayó'o kúu to'on ña nika'an Jesucristo xini so'o ndi, ta vitin ndátoto'on ndi to'on yó'o xí'in ndó, ña káchí saá: Ndatán yóo ño'o ña yé'e, saá yóo Ndios, ta nda lo'o on koó ñanaa yóo xí'in ra. ⁶ Táná ka'an yó ndixa vivíi táku yó xí'in

Ndios, ta saá ni, ndíkɔn ka yó kua'an yó yichi ɔn vá'a ña naa ní, ta ñavatá kúu ña ka'an yó saá, ta ɔn vása kisa ndivi yó ñandaa. ⁷ Yichi Ndios kúu ñava'a ñandaa ɔo yé'e ño'o ña káku ɔo ra. Ta saá tá vivíi ndíkɔn yó yichi Ndios ɔo yé'e ño'o ña káku ɔo ra, ta saá ndixa vivíi táku yó xí'in tá'an yó, ta ndixa ñi Jesucristo nákata ña ndi'i kuachi yó.

⁸ Táná ka'an yó ndí nda lo'o ɔn koó kuachi ndiso yó ɔo Ndios, ta saá ñivi na sándá'ví xí'in mii kúu yó, chi ñavatá kúu ña ka'an yó saá, ta ndixa ɔn koó ñandaa yóo ini yó. ⁹ Ta saá ni, tá na'ma yó ndi'i kuachi yó ɔo Ndios, ta ndixa Ndios kasa ká'no ini ra xa'a kuachi yó, ta nakata ra ndi'i kuachi yó, ta ndasa ndii ra mii yó ɔo ra. Ndxia Ndios ke'é ra saá xí'in yó, chi taa tandaa kúu Ndios ta ndixa kisa ndivi ra to'on ra. ¹⁰ Ta saá ni, táná ka'an yó, káchí yó ndí nda ñii kivi ɔn vása ní-ke'é yó ña ɔn vá'a, ta xí'in to'on yó'o chíkaa yó kuachi sata Ndios ndí kúu ra taa ta vatá. Saá chi mii Ndios káchí ra ndí ndi'i ñivi ké'é na ña ɔn vá'a. Tá ɔn vása kándixa yó to'on yó'o ña ká'an Ndios xa'a yó, ta xí'in ñayó'o sáná'a yó ndí ɔn koó to'on Ndios táku ini yó.

2

To'on yó'o ká'an ndí Jesucristo chíndeé ra mii yó ña náki'in ra to'on yó ɔo Ndios

¹ Ndó'ó, ñivi na kándixa Jesucristo, ndatán yóo sa'ya i, saá yóo ndó, saá chi kí'vi ní ini i xini i ndó'ó. Ta taa i tutu yó'o xaá ña nda'a ndó xa'a ña ɔn ke'é ndó ña ɔn vá'a. Ta saá ni, tá yóo kivi ké'é ndó ña ɔn vá'a, ta xini ñó'ó kundaa ini ndó ndí yóo ñii taa ta chíndeé mii yó ña náki'in ra to'on yó ɔo Yivá yó Ndios, ta tayó'o kúu Jesucristo, taa tandaa. ² Saá chi Jesucristo kúu taa ta ñisoko xí'in mii ña ñixi'i ra xa'a kuachi yó, ñakán Ndios kúchiño kasa ká'no ini ra xa'a kuachi yó. Ta ɔn sivi ndasaá xa'a kuachi mii yó kúu ña

n̄ixi'i Jesucristo, ta xa'a kuachi ndi'i saá n̄ivi ñoyívi yó'o n̄ixi'i ra.

³ Tá kisa ndivi yó ña xá'nda chiño Ndios noo yó, ta xí'in ña ké'é yó saá kúndaā ini yó ndí ndixa x̄ini yó Ndios, ta vivíi táku yó xí'in ra. ⁴ Tá nakuita n̄ivi na ka'an, kachí na saá: “N̄i'i x̄ini ndi Ndios, ta vivíi táku ndi xí'in ra”, kachí na, ta n̄ivi yó'o, tá on vása kisa ndivi na ña xá'nda chiño Ndios, ta saá n̄ivi na vatá kúu nayó'o, ta nda lo'o on koó ñandaā yóo ini na. ⁵ Ta saá ni, tá yóo n̄ivi na kisa ndivi ña ká'an to'on Ndios, ta xí'in ñayó'o n̄ivi yó'o sáná'a na ndí ndixa ndaa kí'vi ini na x̄ini na Ndios. Ta mij yó, xa'a ña kisa ndivi yó ña ká'an Ndios, kúndaā ini yó ndí ñii yóo yó xí'in Ndios. ⁶ Tá káchí yó ñii yóo yó táku yó ini Ndios, ta saá x̄ini ñó'ó ke'é yó ndatán ke'é Jesucristo kivi n̄ixika ra ñoyívi yó'o.

To'on yó'o kúu ña xá'nda chiño noo n̄ivi na kándixa Jesucristo

⁷ Nañani yó xí'in náki'va yó, on sivi ñii to'on ña xaá kúu ña xá'nda chiño i noo ndó vitin, chi to'on Ndios ña xa si'na yóo nda kivi noo kúu ña. Ta to'on yó'o ñii kúu ña xí'in to'on ña yatá ña xa x̄ini so'o ndó. ⁸ To'on ña yatá kúu ña xá'nda chiño i vitin noo ndó, ña x̄ini ñó'ó kuki'vi ini yó koni tá'an yó. Ta saá ni, to'on xaá kúu ñayó'o, chi ñii laá Jesucristo kúu ta ndixa ndaa kisa ndivi to'on yó'o. Ta vitin ndó'ó, n̄ivi na ndíkōn yich̄i ra, ñii ki'va saá ndixa kisa ndivi ndó to'on xaá yó'o. Ta vitin ndee ña on vá'a ña naa, ku'an ndi'i xa'a ña, saá chi kivi kixaa Jesucristo ñoyívi yó'o, ta ndatán yóo ña kixaa ño'o ndino'o ña yé'e, ta kúndeé ña noo naa, saá yóo ña.

⁹ Tá yóo n̄ivi na ká'an, káchí na ndí ndíkōn na yich̄i va'a noo yé'e ño'o, ta n̄ivi yó'o sáā ini na x̄ini na natá'an na, ta saá ñavatá kúu to'on ña ká'an na, chi ña sáā ini na x̄ini na natá'an na sáná'a ña ndí ndíkōn ka na yich̄i on vá'a noo

naa ní. ¹⁰ Ta n̄ivi na ndixa kí'vi ini xíni natá'an na, ta n̄ivi yó'o kúu na ndíkɔn yich̄i va'a n̄oo yóo ño'o yé'e. Ta n̄ivi yó'o, ɔn vása yóo ini na ña sanakava xí'in m̄ji na ña ke'é na ña ɔn vá'a. ¹¹ Ta n̄ivi na sáa ini xíni inka n̄ivi na kándixa Jesucristo, n̄ivi yó'o, xí'in ña ke'é na saá sáná'a na ndí xíka k̄a na yich̄i ɔn vá'a n̄oo naa. Ta saá n̄ivi yó'o ɔn vása xíni na ndá yich̄i kuá'an na, saá chi ñanaa sakuáá ña nduch̄u n̄oo na.

¹² Ta ndó'ó, n̄ivi na kándixa Jesucristo, ndatán yóo sa'ya i, saá yóo ndó, ta taa i tutu yó'o xaá ña nda'a ndó, chi Ndios xa k̄isa ká'no ini ra xa'a kuachi ndó, saá chi Jesucristo n̄ixi'i ra xa'a kuachi yó. ¹³ Ta ndó'ó, n̄ivi na kándixa Jesucristo, na kúu n̄ivi naxikuá'a na to'ó, taa i tutu yó'o xaá ña nda'a ndó, chi xa xíni va'a ndó Jesucristo, taa ta xa táku nda si'na k̄a tá ta'an kixá'á koo k̄ivi noó ñoyívi. Ta ndó'ó, nataa xí'in náña'a na kúu nakuáchí na kándixa Jesucristo, taa i tutu yó'o xaá ña nda'a ndó, chi xa k̄undeé ndó n̄oo ñaním̄a ndiva'a.

Ndi'i ndó'ó na kúu n̄ivi na kándixa Jesucristo, inka yich̄i ká'an i ndí ndatán yóo sa'ya i, saá yóo ndó, ta taa i tutu yó'o xaá ña nda'a ndó, chi xa xíni va'a ndó Yivá yó Ndios. ¹⁴ Ta ndó'ó, n̄ivi na kándixa Jesucristo, na kúu n̄ivi naxikuá'a na to'ó, taa i to'on yó'o ña ndáto'on i xí'in ndó, chi xa xíni va'a ndó Jesucristo, taa ta xa táku nda si'na k̄a tá ɔn ta'an kixá'á koo k̄ivi noó ñoyívi. Ta ndó'ó, na kándixa Jesucristo, na kúu nakuáchí, tuku taa i to'on yó'o ña ndáto'on i xí'in ndó, chi ndó'ó kúu n̄ivi na kómí ní ndee Ndios, ta ndi'i saá k̄ivi to'on Ndios yóo ña táku ña ini ndó, ta saá xa k̄undeé ndó n̄oo ñaním̄a ndiva'a.

¹⁵ Xí'in ndi'i ndó'ó, na kúu n̄ivi na kándixa Jesucristo, taa i to'on ña xaá nda'a ndó, ña ndáto'on i, káchí i saá: ɔn kusij ini ndó kundikɔn ndó yich̄i ɔn vá'a ñoyívi yó'o, ta nda lo'o ɔn kuki'vi ini ndó koni ndó ña ɔn vá'a ña yóo ñoyívi yó'o. Saá chi ndi'i n̄ivi na kí'vi ní k̄a ini xíni na ña

yóo ñoyívi yó'o, ñivi yó'o on vása kí'vi ini na xíni na Yivá yó Ndios. ¹⁶ Chi ndi'i ña on vá'a ña yóo ñoyívi yó'o on sivi ña káku ñoo Ndios kúu ña, ta kuiti káku ña ñoo ñaníma ndiva'a ña xá'nda chiño ñoo ñoyívi yó'o. Tá kóni yó ke'é yó ña on vá'a ña kútoo ní yikí koñu yó, án kóni yó kukomí yó ndi'i ña kúsiini nduchu ñoo yó xíni ña, ta ña kóni yó saá on sivi ña vaxi ñoo Yivá yó Ndios kúu ña. Tá ñivi na ña'a ní ini kúu yó xa'a ñakuiká kómí yó án xa'a chiño ná'no ké'é yó, ta ña ña'a ini yó saá, on sivi ña vaxi ñoo Yivá yó Ndios kúu ña. Saá chi ña xáni siní yó saá kuiti káku ña ñoo yichi on vá'a ñoyívi yó'o. ¹⁷ Ta ñoyívi yó'o xí'in ndi'i ña on vá'a ña kútoo ní ñivi, ña yá'a kuá'an kúu ña, ta kixaa ñii kivi on kóo ka ña. Ta saá ni, ñivi na kísa ndivi ña kóni Ndios, ñivi yó'o on ndi'i xa'a na, ta ndixa kutaku na ndi'i saá kivi.

To'on yó'o ká'an xa'a taa ta sáa ini xíni Jesucristo

¹⁸ Ndó'ó, ñivi na kándixa Jesucristo, ndátan yóo sa'ya i, saá yóo ndó, ta ndát'on i xí'in ndó ndí xa vaxi kuyatin kivi sondí'í ñoyívi yó'o. Xa xini so'o ndó tá vaxi kuyatin kivi sondí'í, ta nakundichi ñii taa ta kúu ta sáa ní ini xíni ra Jesucristo, ta vitin xa yóo kuá'a ní ñivi na kúu na sáa ini xíni na Jesucristo. Ta xí'in ñayó'o kúnda'a ini yó ndí xa yatin vaxi kivi sondí'í ñoyívi yó'o. ¹⁹ Vará sava ñivi na kúu na sáa ini xíni na Jesucristo vitin, xikuu ñivi na si'na ñii xitaku xí'in yó, ta ñivi yó'o on sivi na ndixa kándixa Jesucristo xikuu na. Ta saá ñita'vi tá'an na xí'in mii yó, ta kee na kuá'an na. Ta xí'in ñayó'o kúnda'a va'a ini yó ndí ñivi yó'o nda ñii kivi on vása ní-xiyo yu'ú na xí'in mii yó, chi on vása ndino'o ini na kándixa na Jesucristo. Tá ndixa ñivi na ndino'o ini kándixa Jesucristo xikuu na, ní'kúu, ta yóo ka na kuá'an na yichi ra xí'in yó vitin. Ta xa'a ña ñita'vi tá'an na xí'in yó, na kúu ñivi na ndixa ndikon

Jesucristo, kúndaꝯ ini yó ndí nivi yó'o nda lo'o on vása ní-xikuu na nañani yó án náki'va yó.

²⁰ Ta ndó'ó, on sivi ndatán yóo nivi yó'o yóo ndó. Saá chi Jesucristo, Taa taYii, ti'vi ra Níma Ndios ña kutaku ña ini ndó. Ta xa'a ña táku Níma Ndios ini ndó, xa xini ndó ndi'i ñandaꝯ. ²¹ Ta xa'a ña kúndaꝯ ini i ndí xa xini ndó ñandaꝯ, táa i to'on yó'o xaꝯ ña nda'a ndó. Saá chi miji yó kúndaꝯ ini yó ndí nda ñii to'on ña vatá on vása káku ña noo Ndios, taa ta kúu tандаꝯ ndino'o.

²² Ta, ¿yu kúu nivi na vatá ní? Nivi na vatá ní kúu na ká'an, káchí na ndí on sivi taJesús kúu Cristo, taa ta ti'vi Ndios sakaku ra nivi ñoyívi yó'o. Nivi na káchí saá kúu nivi na sáa ini xini na Jesucristo. Ta nivi yó'o kúu nivi na on xijn kandixa Ndios, ni on xijn na kandixa na Sa'ya ra Jesucristo. ²³ Tá yóo nivi na on xijn kandixa Sa'ya Ndios, ñayó'o kóni káchí ña ndí on xijn na kandixa na miji Ndios. Ta nivi na ndino'o ini ká'an ndátoto'on na ndí kándixa na Sa'ya Ndios, ta nivi yó'o kúu na táku Ndios ini.

²⁴ Ta ndó'ó, on sandakoo ndó kándixa ndó to'on va'a xa'a Jesucristo, ña kúu ña xini so'o ndó nda kivi noo ña kixá'a ndó kándixa ndó ra. Ta xí'in ña ke'é ndó saá, ndi'i saá kivi yóo ndó táku ndó ini Jesucristo, taa ta kúu Sa'ya Ndios, ta ñii ki'va saá yóo ndó táku ndó ini Yivá yó Ndios.

²⁵ Jesucristo nika'an ra, kindoo ra xí'in yó, na kúu nivi na kándixa ña'a, ta nika'an ra, káchí ra saá: “Nda'a nivi na kándixa yi'i taxi i ña ndixa ndino'o kutaku na xí'in i ndi'i saá kivi”, saá káchí Jesucristo, kindoo ra xí'in yó.

²⁶ Táa i to'on yó'o ña ndatoto'on i xí'in ndó xa'a nivi na kóni sandá'vi ndó'ó xí'in to'on vatá. ²⁷ Jesucristo xa ti'vi ra Níma Ndios ña koo ña xí'in ndó, ta Níma yó'o yóo ña táku ña ini ndó ndi'i saá kivi. Ta saá on vása xini ñó'ó ndó nivi ña saná'a na ndó'ó, chi Níma Ndios saná'a ña ndó'ó xa'a ndi'i ñandaꝯ. Ta ndi'i ña saná'a Níma Ndios kúu to'on ña ndaa ndino'o, ta nda lo'o on koó ñavatá ká'an Níma

Ndios. Ta ndi'i saá kivi xini ñó'ó koo ndó kutaku ndó ini Jesucristo. Ta ñii ki'va ndatán Níma Ndios sáná'a ña ndó'ó ndasaá kutaku ndó, ta saá xini ñó'ó va'a kutaku ndó.

²⁸ Ndó'ó, nivi na kándixa Jesucristo, ndatán yóo sa'ya i, saá yóo ndó, ta ndát'on i xí'in ndó ña koo ndó kutaku ndó ini Jesucristo, ta nda ñii kivi on sandakoo ndó yichi ra. Ta saá tá kixaa kivi ndikó ra ñoyívi yó'o, ta on vása kuyi'vi ndó noo ra, ni on vása kuka'an noo ndó kuita ndó noo ra. ²⁹ Xini yó Jesucristo kúu ñii ta tandaa ndino'o, ta saá kúndaa ini yó ndí ndi'i nivi na ké'é ñandaa ndatán yóo ña ké'é Jesucristo, nayó'o kúu nasa'ya ndino'o Ndios.

3

*T'on yó'o ká'an ndí sa'ya Ndios
kúu nivi na ndíkon yichi ra*

¹ Ndachun ndeé ní kí'vi ini Yivá yó Ndios xini ra mii yó! Saá chi sákunaní ra yó sa'ya mii ra. Ta, ñdixa sa'ya Ndios kúu mii yó! Ta nivi na ndíkon yichi on vá'a ñoyívi yó'o, on vása nákoní na ndí sa'ya Ndios kúu yó, chi nivi yó'o on vása xini na Ndios. ² Nañani yó xí'in náki'va yó, nivi na kí'vi ní ini i xini i kúu ndó, ta ndát'on i xí'in ndó ndí mii yó kúu sa'ya Ndios vitin. Ta saá ni, on ta'án kundaa va'a ini yó ndasaá nduu yó kivi ña vaxi ña kutaku yó ñoyívi ñino xí'in Ndios. Ta vitin kúndaa ini yó ndí kivi ndikó Jesucristo ñoyívi yó'o, ta mii yó, nivi na kándixa ña'á, nduu yó ndatán yóo ra. Saá chi xí'in nduchú noo yó koni yó ra. Ndátán mii káa ra, saá ndixa koni ndino'o yó ra. ³ Ta ndi'i nivi na kúsii ini ndáti ña ndikó Jesucristo, chi ndáa ini na ndí kivi saá kundivi ña ndáti na, nivi yó'o chíkaa na ndeé xí'in mii na ña nduu na nivi na on koó kuachi kuiso noo Ndios. Ta xa'a ña ndíkon na Jesucristo kúu ña ké'é na saá, chi Jesucristo kúu ta ta ndii ndino'o.

⁴ Ndi'i nivi na ké'é ña on vá'a kúu nivi na yá'a ndoso noo ndayí Ndios ta ndíso na kuachi noo ra. Saá chi ndi'i noo ña on vá'a ké'é nivi kúu ña yá'a ndoso ndayí Ndios. ⁵ Xa xíni ndó ña kixaa Jesucristo ñoyívi yó'o kúu xa'a ña kindaa ra kuachi ña ndíso nivi. Ta nda lo'o on koó kuachi ndíso Jesucristo, taa ta ndii ndino'o kúu ra. ⁶ Ta saá nivi na ndixa ndíkõn Jesucristo, tá ñii táku na xí'in ra, ta nivi yó'o on vása ndíkõn na yichi noo ké'é na ña on vá'a. Ta nivi na ndíkõn yichi noo ké'é na ña on vá'a, nivi yó'o kúu nivi na on ta'án nakutá'an xí'in Jesucristo, ni on ta'án koni na ra. ⁷ Nañani yó xí'in náki'va yó, ndatán yóo sa'ya mi i, saá yóo ndó, ta ndátõ'on i xí'in ndó ña on taxi ndó ña sandá'vi nivi ndó'ó xí'in to'on vatá ña on vása yóo yu'ú xí'in to'on ña káchí saá: Nivi na kisa ndivi ñandaa kúu nivi nandaa. Ndatán yóo Jesucristo taa tãndaa, saá yóo nivi yó'o, na kúu na kisa ndivi ñandaa. ⁸ Ta nivi na on xiin sandakoo ké'é ña on vá'a kúu nivi na ndíkõn yichi noo xá'nda chiño ñanímã ndiva'a, saá chi nda kivi noó ñanímã ndiva'a on vása sãndakoo ña ké'é ña ndi'i saá noo ña on vá'a. Ta xa'a ñayó'o Ndios ti'vi ra Jesucristo kixaa ra ñoyívi yó'o ña sandi'i ra xa'a ndi'i chiño ña ké'é ñanímã ndiva'a yó'o.

⁹ Tá ndixa sa'ya Ndios kúu yó, ta saá on vása ku'a'an ka yó yichi noo xá'nda chiño ña on vá'a noo yó, saá chi Ndios xa taxi ra Nímã ra ña táku ini yó, ta ndatán yóo ini Ndios saá yóo ini yó vitin. Ta xa'a ñayó'o, on vása kúchiño yó kutaku yó ké'é yó ña on vá'a. Saá chi vitin táku yó ké'é yó ña kóni Ndios. ¹⁰ Ta kúchiño kũndaa ini yó yu kúu sa'ya Ndios ta yu kúu sa'ya ñanímã ndiva'a. Saá chi ndi'i nivi na on vása kisa ndivi ñandaa, nayó'o sáná'a na ndi on sivi sa'ya Ndios kúu na. Ta ndi'i nivi na on vása kí'vi ini xíni nañani na án náki'va na, on sivi sa'ya Ndios kúu nayó'o.

¹¹ Ñayó'o kúu to'on Ndios ña xini so'o yó nda kivi kixá'á yó kãndixa yó Jesucristo, to'on ña káchí saá: Kuki'vi ini yó

koni tá'an yó, káchí ña. ¹² Ta ɔn vá'a koo yó ndatán nixiyo taCaín kuiya xina'á, chi tayó'o nixika ra yichi ñaniṃa ndiva'a, ta xa'ni ra ñani ra. Ta, ɔndachun xa'ni ra ñani ra? Ke'é ra saá xa'a ña kisa kuini ini ra xini ra ñani ra, chi ñani ra xitaku ra ké'é ra ñandaṃ noo Ndios, ta taCaín yó'o xitaku ra ké'é ra ña ɔn vá'a.

¹³ Nañani yó xí'in náki'va yó, ndó'ó kúu nivi na táku ké'é ñandaṃ. Ta xa'a ña ké'é ndó ñava'a saá, nivi na ndikon yichi ɔn vá'a ñoyivi yó'o sáa ini na xini na ndó'ó. Ta nda lo'o ɔn naka'nda ini ndó koni ndó ña ké'é na saá. ¹⁴ Ta miji yó, nivi na kándixa Jesucristo, kúu yó nivi na kí'vi ini xini tá'an. Ta xí'in ña ké'é yó saá kundaṃ ini yó ndí ndixa sandakoo va'a yó yichi ɔn vá'a ña salo'o sandi'i xa'a yó, níkúu, ta vitin kua'an yó yichi noo ndixa táku ndino'o yó noo Ndios. Ta ndi'i nivi na ɔn vása kí'vi ini xini natá'an na, nivi yó'o, vará xíka ka na ñoyivi yó'o, ɔn vása táku na noo Ndios. ¹⁵ Ta ndi'i nivi na sáa ini xini natá'an na, ta nivi yó'o ñii ki'va kúu na xí'in nivi na xíka xá'ni inka nivi. Ta xini yó ndí ndi'i nivi na xíka xá'ni inka nivi, ɔn sivi nivi na táku noo Ndios kúu nayó'o. ¹⁶ Xini ñó'ó kundaṃ ini yó xa'a ñava'a ké'é Jesucristo xa'a yó, chi taxi xí'in miji ra nixi'i ra xa'a kuachi yó. Ta ña ké'é ra saá táxi ña kundaṃ ini yó ndasaá xini ñó'ó ndixa kuki'vi ini yó koni yó nañani yó xí'in náki'va yó. Ta saá miji yó nivi na ndikon yichi Jesucristo, ñii ki'va ndatán kí'vi ini ra xini ra miji yó, saá xini ñó'ó kuki'vi ini yó koni tá'an yó, ta taxi xí'in miji yó ña chindeé tá'an yó tанда kivi yó xa'a nañani yó xí'in náki'va yó. ¹⁷ Tá yóo natá'an yó na ɔn koó ña xini ñó'ó ña kómí na, ta yóo sava miji yó na kómí ña xini ñó'ó natá'an yó yó'o, ta saá va'a taxi yó ña xini ñó'ó na nda'a na. Tá ɔn vása ké'é yó saá, ta ñayó'o kóni kachí ña ndí ɔn vása kí'vi ini yó xini yó natá'an yó yó'o, ndatán Ndios kí'vi ní ini ra xini ra miji yó. ¹⁸ Nañani yó xí'in náki'va yó, ndatán yóo sa'ya i yóo ndó,

ta ndátò'on i xí'in ndó ndí on vá'a kuiti ka'an yó kachí yó ndí kí'vi ini yó xíni yó natá'an yó, chi xínì ñó'ó kasa ndivi yó chiño ña sáná'a ndí ndixa kí'vi ini yó xíni yó na.

¹⁹ Tá xí'in ña ndixa kí'vi ini yó xíni yó natá'an yó, ta saá kúnda*a* ini yó ndí nivi na ndixa ndík'on Ndios kúu yó, ta on vása kúka'an noo yó noo ra, ta va'a yóo ini yó noo ra. ²⁰ Ta saá ni, tá ním*a* yó chíka*a* ña kuachi xa'a m*i*y yó, ta saá xínì ñó'ó kúnda*a* ini yó ndí ká'no ní ka yóo ini Ndios ña kasa ká'no ini ra xa'a yó, ta Ndios xínì va'a ra ndi'i ña yóo ini yó. ²¹ Ndó'ó kúu nivi na kí'vi ní ini i xíni i, ta ndátò'on i xí'in ndó, káchí i saá: Tá ním*a* yó on vása chíka*a* ña kuachi s*a*ta yó noo Ndios, ta saá on vása kúka'an noo yó noo Ndios, ta xí'in ña ndino'o ini yó kuchiño yó ka'an yó xí'in ra. ²² Ta saá ndi'i ña ndúkú yó noo Ndios, taxi ra ña nda'a yó, saá chi kisa ndivi yó ña xá'nda chiño ra noo yó, ta ké'é yó chiño ña kús*i* ini ra xíni ra. ²³ Ta ñayó'o kúu ña xá'nda chiño Ndios noo yó: Xínì ñó'ó kandixa yó Jesucristo, ta*a* ta kúu Sa'ya Ndios, ta xínì ñó'ó kuki'vi ini yó koni yó natá'an yó, ñii ki'va ndatán m*i*y Jesucristo xa'nda chiño ra noo yó kivi nixika ra ñoyívi yó'o. ²⁴ Ta ndi'i nivi na kisa ndivi ña xá'nda chiño Ndios, nivi yó'o táku na ini Ndios ta Ndios táku ra ini nivi yó'o. Ta ndixa kúnda*a* ini yó ndí táku Ndios ini yó chi taxi ra Ním*a* ra nda'a yó, ta ndixa táku Ním*a* ra ini yó.

4

*To'on yó'o ndátò'on ndasaá kúchiño nakoni yó Ním*a* Ndios*

¹ Nañani yó xí'in náki'va yó, ndó'ó kúu nivi na kí'vi ní ini i xíni i, ta ndátò'on i xí'in ndó ña on kandixa ndó ndi'i nivi na ká'an, káchí na saá: “To'on ña taxi Ním*a* Ndios kúu ña ká'an ndi”, káchí na. Ta xínì ñó'ó koto ndoso ndó nivi yó'o xa'a ña kúnda*a* ini ndó án ndixa Ním*a* Ndios kúu ña taxi to'on ká'an na, chi yóo ku'a'a ní naprofeta vatá na xíka

ñoyívi yó'lo vitin. ² Ndátɔ'on i xí'in ndó ndasaá kúchiño nakoni ndó tá ndixa Níma Ndios kúu ña taxi to'on ña ká'an nivi yó'lo. Tá nivi yó'lo ndákuijn na xa'a Jesucristo, káchí na saá: “Jesucristo, kixaa ra ñoyívi yó'lo, ta xikuu ra nivi ndino'o xí'in yikí koñu ñii ki'va ndatán yóo yikí koñu mij yó”, káchí na, ta saá kúndaá ini yó ndí to'on ña ká'an na kúu ña taxi Níma Ndios nda'a na. ³ Ta nivi na on xiin ka'an ndí Jesucristo xikuu ra nivi ndino'o, ta xikomí ra yikí koñu ndino'o, ñii ki'va ndatán yóo yikí koñu mij yó, ta nivi yó'lo on vása ká'an na to'on ña taxi Níma Ndios nda'a na. Ta nivi yó'lo ká'an na ndasaá kuiti to'on ña taxi níma ña sáa ini xini Jesucristo. Xa xinj so'lo ndó ndí ñii kivi kixaa níma yó'lo, ña kúu ña sáa ini xini Jesucristo, ta vitin xa yóo ña, xíka ña ñoyívi yó'lo.

⁴ Ta ndó'ó, ndatán yóo sa'ya i, saá yóo ndó, ta ndó'ó kúu nivi na ndíkɔn Ndios. Ta xa kúndeé ndó noo naprofeta vatá, na on vása ká'an to'on Ndios. Ta mij ndó, xa'a ña táku Níma Ndios ini ndó, xa kúndeé ndó noo navatá yó'lo, saá chi Níma Ndios kúu ña ndeé ní ka noo ñaníma ndiva'a ña xíka ñoyívi yó'lo. ⁵ Naprofeta vatá kúu nivi na ndíkɔn yichi on vá'a ñoyívi yó'lo, ta ká'an na to'on ña taxi níma ña xá'nda chiño noo yichi on vá'a yó'lo. Ta saá nivi na ndíkɔn yichi ñoyívi yó'lo chíkaa so'lo na to'on vatá yó'lo. ⁶ Ta mij yó, nivi na ndíkɔn Ndios kúu yó, ta xa'a ñayó'lo inká nivi na xa xinj va'a Ndios, nayó'lo chíkaa so'lo na to'on ña ká'an yó. Ta nivi na on vása ndíkɔn Ndios, nivi yó'lo on xiin na chíkaa so'lo na to'on ña ká'an yó. Ta xí'in ña ké'é nivi saá, kúchiño yó kúndaá ini yó án Níma Ndios kúu ña táku ini nivi yó'lo, án níma vatá kúu ña táku ini na.

To'on yó'lo ká'an ndí Ndios kí'vi ní ini ra xini ra nivi

⁷ Nañani yó xí'in náki'va yó, kí'vi ní ini i xini i ndó'ó, ta ndi'i mij yó xini ñó'ó kuki'vi ní ini yó koni tá'an yó, saá chi Ndios kúu ta ta táxi ndeé nda'a yó ña ke'é yó saá. Ta ndi'i

n̄ivi na kí'vi ini x̄ini natá'an na, n̄ivi yó'o ndixa kúu nasa'ya Ndios, ta kúu na n̄ivi na ndixa va'a x̄ini Ndios. ⁸ Ndi'i n̄ivi na on vása kí'vi ini x̄ini natá'an na, ta n̄ivi yó'o on vása x̄ini va'a na Ndios, chi ndixa ini Ndios chútú ña x̄i'in ña kí'vi ní ini ra x̄ini ra ndi'i n̄ivi. ⁹ Ta Ndios saná'a ra ndí ña ndixa ndaa ní kí'vi ini ra x̄ini ra ndi'i yó, chi t̄i'ví ra Sa'ya ra ta ñii laá noo ra, k̄ixaa ra ñoyívi yó'o, ta n̄ixi'i ra xa'a kuachi yó, ta xa'a ña ke'é ra saá kuchiño kutaku ndino'o yó ndi'i saá k̄ivi x̄i'in Ndios. ¹⁰ Vará kí'vi ní ini yó x̄ini yó Ndios, ta m̄i yó on vása tonda yó kundeé yó ña kuki'vi ini yó koni yó ra ñii k̄i'va ndatán Ndios kí'vi ní ini ra x̄ini ra m̄i yó. Saá chi Ndios saná'a ra ndasaá ndeé ní kí'vi ini ra x̄ini ra m̄i yó, chi t̄i'ví ra Sa'ya ra Jesucristo k̄ixaa ra ñoyívi yó'o, ta n̄isoko x̄i'in m̄i ra xa'a kuachi yó.

¹¹ Nañani yó x̄i'in náki'va yó, xa'a ña kúnda ini yó ndí Ndios kí'vi ní ini ra x̄ini ra m̄i yó, ta saá m̄i yó ndixa x̄ini ñó'ó kuki'vi ní ini yó koni tá'an yó. ¹² Nda ñii n̄ivi on ta'an koni na Ndios x̄i'in nduchū noo na, ta saá ni, tá ndixa kí'vi ini yó x̄ini tá'an yó, ta saá Ndios yóo ra táku ra ini yó, ta x̄i'in ndeé ra ñii ñii k̄ivi m̄i yó va'a ka kuki'vi ini yó koni tá'an yó, nda tonda yó kuki'vi ini yó koni tá'an yó, ndatán ñii k̄i'va kí'vi ini Ndios x̄ini ra m̄i yó. ¹³ Ndixa Ndios xa taxi ra Níma ra yóo ña táku ña ini yó. Ta x̄i'in ña ke'é ra saá, kúnda ini yó ndí yóo yó táku yó ini Ndios ta Ndios yóo ra táku ra ini yó. ¹⁴ Ta m̄i ndi, x̄i'in nduchū noo ndi x̄ini ndi Jesucristo k̄ivi n̄ixika ra ñoyívi yó'o, ñakán ká'an ndi ndákuiin ndi noo ndó ndí Jesucristo kúu Sa'ya Ndios, ta Ndios t̄i'ví ña'a ra k̄ixaa ra ñoyívi yó'o xa'a ña sakaku ra n̄ivi noo ña on vá'a. ¹⁵ Ta ndi'i n̄ivi na ndino'o ini ká'an ña kándixa na ndí Jesucristo kúu Sa'ya Ndios, Ndios yóo ra táku ra ini n̄ivi yó'o, ta n̄ivi yó'o yóo na táku na ini Ndios.

¹⁶ X̄ini va'a yó ta kúnda ini yó ndí ndixa kí'vi ini Ndios x̄ini ra m̄i yó, saá chi ini Ndios chútú ña x̄i'in ña kí'vi

ndino'o ini ra xíni ra ndi'i nivi. Ta ndi'i nivi na ñii ñii kivi táku na xí'in ña kí'vi ini na xíni na Ndios, ta xí'in ña kí'vi ini na xíni na natá'an na, ta nivi yó'o, kúu nivi na yóo táku ini Ndios, ta Ndios yóo ra táku ra ini nivi yó'o. ¹⁷ Ta xí'in ña yóo Ndios táku ra ini yó, tondaa yó kuki'vi ndino'o ini yó koni yó ra, ta saá tuku tondaa yó kuki'vi ndino'o ini yó koni yó natá'an yó. Ta ña táku yó saá, sáná'a yó ndí táku yó ndatán xitaku Jesucristo ñoyívi yó'o. Ta xa'a ña táku yó saá on kuyi'ví yó kuita yó noo Ndios kivi ña kasa nani ra xa'a kuachi nivi. ¹⁸ Tá ndixa kúndaá ini yó ndí Ndios kí'vi ní ini ra xíni ra mii yó, ta tá kí'vi ní ini yó xíni yó Ndios, ta tá kí'vi ní ini yó xíni yó natá'an yó, ta ña ké'é yó saá on taxi ña kuyi'ví ini yó noo Ndios. Saá chi ña yí'ví ini nivi noo Ndios, káku ña noo ña yí'ví ini na noo ña saxo'vi ra na xa'a kuachi na. Ta saá tá yí'ví ini yó noo Ndios, ta kóni kachí ñayó'o ndí on ta'an tondaa yó kuki'vi ini yó koni yó natá'an yó ñii ki'va ndatán kí'vi ini Ndios xíni ra mii yó.

¹⁹ Vitin kí'vi ini yó xíni yó Ndios chi Ndios kúu ta ta si'na kixá'á kí'vi ini xíni ra mii yó. ²⁰ Tá yóo ñii nivi, ká'an na kachí na saá: “Yi'i kí'vi ini i xíni i Ndios”, ta saá ni, nivi yó'o sáa ini na xíni na natá'an na, ta on sivi ñandaá kúu ña kachí nayó'o ña kí'vi ini na xíni na Ndios. Saá chi tá on vása kí'vi ini yó xíni yó nivi na va'a xíto yó xí'in nduchu noo yó, ta saá on vása kúchiño yó kuki'vi ini yó koni yó Ndios, ta ta on vása xíto yó xí'in nduchu noo yó. ²¹ Mii Jesucristo xa'nda chiño ra noo yó, kachí ra saá: “Ndi'i nivi na kí'vi ini xíni na Ndios, nivi yó'o xíni ñó'ó kuki'vi ini na koni na natá'an na”, kachí ra.

5

Tə'on yó'o ká'an ndí nivi na ndíkən ta Jesús kúndeé na noo yichí on vá'a ñoyívi yó'o

¹ Ndi'i n̄ivi na kándixa ndí ta Jesús kúu Cristo, ɬaa ɬa ɬi'ví Ndios sakaku ra m̄i yó, ta n̄ivi yó'o kúu sa'ya ndino'o Ndios. Ta ndi'i n̄ivi na ndixa kí'vi ini xíni na Yivá yó Ndios, ta n̄ivi yó'o, saá tuku kí'vi ini na xíni na n̄ivi na kúu sa'ya ra. ² Tá kí'vi ini yó xíni yó Ndios ta kisa ndivi yó ña xá'nda chiño ra noo yó, ta xí'in ña ké'é yó saá, kúndaā ini yó ndí ndixa kí'vi ini yó xíni yó n̄ivi na ñii kúu sa'ya Ndios xí'in yó. ³ Tá ndixa kisa ndivi yó ña xá'nda chiño Ndios noo yó, ta xí'in ñayó'o sáná'a yó ndí ndixa ndino'o kí'vi ini yó xíni yó ra. Ta ndi'i ña xá'nda chiño Ndios noo yó on vása yo'vi ní kasa ndivi yó ña. ⁴ Saá chi ndi'i m̄i yó, n̄ivi na kúu sa'ya Ndios, ndixa kúndeé yó noo yichi on vá'a ñoyívi yó'o. Xa'a ña kándixa yó Jesucristo, kómí yó ndee ña kúndeé yó noo yichi on vá'a. ⁵ Saá chi n̄ivi na kándixa Jesucristo kúu Sa'ya Ndios, ndasaá kuiti n̄ivi yó'o kúu n̄ivi na kúndeé noo yichi on vá'a ñoyívi yó'o.

Tɔ'on yó'o ká'an ndí yóo un̄i ña ndákuijn xa'a Jesucristo

⁶ Jesucristo kixaa ra ñoyívi yó'o, ta yóo un̄i ña táxi kúndaā ini yó yu kúu ra. Saá chi yóo takuíí tá ch̄ichi Jesucristo, ta yóo n̄i Jesucristo ña n̄ixita, ta yóo Níma Ndios ña ndákuijn xa'a Jesucristo, ta Níma Ndios kúu ña ká'an tɔ'on ndaa ndino'o. ⁷ Ta saá yóo un̄i ña ndákuijn xa'a Jesucristo ñoyívi n̄ino, ta ñii ña kúu Yivá yó Ndios, ta inkā ña kúu Tɔ'on Ndios, ta inkā ña kúu Níma Ndios, ta ña un̄i yó'o ñii laá kúu ña. ⁸ Ta yóo un̄i ña ndákuijn xa'a Jesucristo ñoyívi yó'o, ta ñii ña kúu Níma Ndios, ta inkā ña kúu takuíí tá ch̄ichi Jesucristo, ta inkā ña kúu n̄i ña kee yík̄i koñu Jesucristo k̄iv̄i n̄ixi'l̄i ra nda'a tón cruz. Ta un̄i ñayó'o ñii yóo yu'ú ña. ⁹ M̄i yó kándixa yó tɔ'on ña ká'an n̄ivi xí'in yó, ta ña ndáya'ví ní ka kúu tɔ'on ña ká'an Ndios. Saá chi m̄i Ndios kúu ɬaa ɬa ndákuijn xa'a Sa'ya ra Jesucristo. ¹⁰ Ta ndi'i n̄ivi na kándixa Jesucristo ɬaa ɬa kúu Sa'ya Ndios, ta ini ñii ñii n̄ivi yó'o yóo tɔ'on ña ndákuijn

xa'a ra. Ta nivi na on vása kándixa to'on ña ká'an Ndios xa'a Jesucristo, nivi yó'o kóni kachí na ndí Ndios kúu taa ta vatá, chi on xiin na kandixa na ndí to'on ña ká'an Ndios xa'a Sa'ya ra kúu ñandaa. ¹¹ To'on ña ndákuiin Ndios kúu ña káchí saá: Ndios xa taxi ra ña ndino'o kutaku yó xí'in ra ndi'i saá kivi ña vaxi. Ke'é ra saá xí'in yó chi kándixa yó Sa'ya ra Jesucristo, taa ta táku ndino'o, ta ñii yóo yó xí'in ra. ¹² Ndi'i nivi na táku Jesucristo ini, nayó'o kúu na táku ndino'o noo Ndios. Ta nivi na on vása táku Jesucristo ini, nayó'o on vása táku na noo Ndios.

*To'on yó'o ká'an ña ndí nivi na kándixa Jesucristo
kutaku ndino'o na ndi'i saá kivi*

¹³ Taa i tutu yó'o ña xaa ña nda'a ndó, na kúu nivi na kándixa Jesucristo, taa ta kúu Sa'ya Ndios, chi kóni i ña kundaa ini ndó ndí ndixa xa táku ndino'o ndó noo Ndios, ta kutaku ndó xí'in ra ndi'i saá kivi ña vaxi.

¹⁴ Ta mji yó, nivi na kándixa Jesucristo, ndino'o ndaa ini yó ña Ndios ndixa xini so'o ra ndi'i ña ndúkú yó noo ra. Tá ña ndúkú yó noo Ndios kúu ñava'a, ña ñii kúu xí'in ña kóni mji ra, ta saá ndixa chíkaa so'o ra to'on ká'an yó xí'in ra. ¹⁵ Ndixa kúndaa ini yó ndí Ndios xini so'o ra ndi'i ña ndúkú yó noo ra, ta xa'a ñayó'o, ndaa ini yó ndí Ndios xa taxi ra nda'a yó ña kúu ña ndúkú yó noo ra.

¹⁶ Tá xito yó ñii natá'an yó na kándixa Jesucristo ké'é na ña on vá'a, ta saá va'a ná ndukú yó noo Ndios xa'a na. Ta saá Ndios kúchiño kasa ká'no ini ra xa'a nayó'o, ta taxi ra ña va'a nakutá'an tuku na xí'in ra. To'on yó'o ká'an i xa'a nivi na on vása ní-ki'vi kuachi ndeé ña sandi'i xa'a na noo Ndios. Saá chi ndixa yóo kuachi ndeé ní ña sandi'i xa'a nivi noo Ndios, ta on vása ká'an i ña ndukú yó noo Ndios ña kasa ká'no ini ra xa'a kuachi yó'o. ¹⁷ Ndi'i saá noo ña on vá'a ké'é nivi, ñayó'o kúu kuachi noo Ndios. Ta saá ni,

on sivi ndi'i ña on vá'a ké'é nivi kúu kuachi ña sandi'i xa'a na noo Ndios.

¹⁸ Ta miji yó, nivi na ndixa ndikon Ndios, on vása táku ka yó ké'é yó ña on vá'a. Saá chi Jesucristo, ta ta kúu Sa'ya Ndios ndáa ra miji yó, nivi na kándixa ña'á, ta saá ñaníma ndiva'a on vása kúchiño ka ña sandá'ví ña miji yó.

¹⁹ Xíni yó ndí sa'ya Ndios kúu miji yó, ta táku yó tixin ndee ra. Ta nivi na ndikon yichi on vá'a ñoyívi yó'o, nayó'o táku na tixin ndee ñaníma ndiva'a ká'no.

²⁰ Xíni yó ndí kixaa Jesucristo Sa'ya Ndios ñoyívi yó'o, ta xa taxí ra ña koni va'a yó Ndios ta ta kúu tанда ndino'o. Ta saá vitin táku yó ini Sa'ya Ndios, ta kúu Jesucristo. Jesucristo kúu Ndios ndino'o, ta kúu ra ta ta ndino'o táku ndi'i saá kivi. ²¹ Nañani yó xí'in náki'va yó, ndó'ó yóo ndó ndatán yóo sa'ya i, ta ndát'on i xí'in ndó to'on ña xini ñó'ó ní, ña káchí saá: Kasa kuenda xí'in miji ndó ña on kasa to'ó ndó, ni on kasa ká'no ndó nda ñii ñaidolo, ni nda ñii ñaimagen, chi ndi'i ñayó'o kúu ndios vatá. Saá ná koo ña.

Alacatlalzala Mixtec New Testament
Mixtec, Alacatlalzala: Alacatlalzala Mixtec New Testament (New
Testament+)

copyright © 2019 Wycliffe Bible Translators, Inc.

Language: Mixtec, Alacatlalzala

Contributor: Wycliffe Bible Translators, Inc.

All rights reserved.

2020-11-11

PDF generated using Haiola and XeLaTeX on 14 Jun 2022 from source files dated 13 Jun
2022

a74bfb3f-bd55-5ab9-983e-8d19de48c198